

Leo Trotzki – dal scriptur al generalissim

Anniversari da 70 onns dapi l'assassinat da Leo Trotzki

DA JOHANN ULRICH SCHLEGEL

■ **I dat paucas personalitads da l'istorgia mundiala cun in destin talmain fascinanz, impressiunant e perturbant sco quel dal revoluziunari Leo Bronstein, meglier enconuschent sco Leo Trotzki.** El è bain l'unfrenda la pli famusa da Josef Stalin, l'intrigant perfid ed en cumparegliazion cun Trotzki franc er inferiur, il qual al ha laschè assassinà a moda brutala – gist avant 70 onns – ils 21 d'avust 1940 en il Mexico lontan.

Svilup en il spiert dal temp

Il bab da Trotzki n'è betg bainstant, ma almain posseda el in bain ed è da spiert uschè avert ch'el trametta ses figl talentà a scola ed al gimnasi. A la sava dal tschientaner era la situaziun politica en il sid da la Russia magari precara.

Dal pitschen emploià statal enfin a l'imperatur n'è nagin pli segir da sia vita. Igl è in gieu cuntinuant da giat e mieur. Ma ils revoluziunaris han la meglra posiziun. Els sajettan sco emprims, els èn bler pli agressivs ch'il zarissem moribund ed els proclameschan surtut la teoria d'in nov e meglier avegnir. Insumma, il spiert dal temp è da la vart sanestra ed el penetrescha en tut ils circuls: povers e ritgs, supprimids e supprimiders, schuldads ed uffiziers.

Per tant è il giuven Bronstein la mieur. El vegn arrestà il 1898 da la polizia secreta. Il student Bronstein na sesa ussa betg en l'auditori da l'università, mabain en la praschun d'Odesa. E gist las praschuns remplazzan ussa l'università. L'agitaziun è là anc pli concentrada ch'en la libertad. Sia emprima dunna daventa Alexandra Sokolovskaja. Ella accompagna Trotzki en l'exiliaziun en Sibiria.

Bronstein sviluppa in'actività litterara da success quasi fulminant. El scriva en la gassetta d'Irkutsk «Östliche Rundschau» davart ils purs, davart ils classichers russ ed occidentals, sco per exempel davart Friedrich Nietzsche, davart l'amur, la mort. Il pèr praschunier bandischà ha entant gia dus uffants. Trotzki crai dentant da betg pli tegnair or en la Sibiria. Zuppà sut strom sin in char da purs cuntanscha el ina pitschna staziun da viafier. Amis procuran per vestgadira civila andanta. Perfin in pass sfalsifitgà agiuntan els. El sto mo anc scriver en in num. La sort è tratga. A partir da quel mument sa numna el Leo Trotzki.

Sia fugia al maina a Samara sper la Wolga, nua ch'el cuntinuescha sia attività revoluziunara tar la gassetta illegala «Iskra». Ses artitgels cuntanschan

Londra. E là residiescha Lenin, il revoluziunari pussant e zunt stimà. Trotzki sa metta puspè en viadi. Il 1902 splunta el a la porta da Lenin.

Qua capita per uschè dir in accident dal destin: Trotzki e Lenin, ils dus gigants cuntradictorics da la revoluziun, sa confruntan.

Trotzki na dependa betg dal surbab Lenin. Sco partenari da discussiun eloquent, oratur brigliant e publicist fitg talentà cuntanscha Trotzki a Londra spert ina reputaziun talmain famusa tranter ils emigrants, revoluziunaris, narodnikis ed anarchists che la SDAPR, la Partida socialdemocratica dals lavurers da la Russia, al trametta sin viadi sin il continent, a Paris, a Bruxelles, en Svizra ed en Germania, per discurre davant ses cumpatriots davart l'impurtanta organizaziun e gassetta revoluziunara «Iskra».

Sin quest viadi emprenda el ad enconuscher sia segunda dunna Natalia Sedowa che studegia istorgia d'art a la Sorbonne a Paris. Ella parta cun el ina vita excepziunala enfin sia mort en il Mexico. La SDAPR cumenza ses segund di da partida a Bruxelles e Londra, e Trotzki s'oppona vehementmain a Lenin che promovava la spartiziun en menschevics e bolschevics. Alura rumpa la revoluziun or il 1905. Trotzki sa renda immediat a St. Petersburg. En in'abitaziun conspirativa da la scola d'artiglieria d'armada chatta el il refugiu ideal.

In civilist sco cumandant militar

La responsabladad per la Duma, il parlament concedì dal zar, dueva ina nova regenza surpigliar. I sa furma però in terz factur da pussanza. Ils revoluziunaris da las fabricas e da l'armada furman uschenumnads cussegls u sovjets. Il pli impurtant da tut ils sovjets daventa il 1905 dentant Trotzki che vegn elegì a St. Petersburg sco president.

Alura intervegn la polizia danovmain. A Trotzki vegn fatg il process. La libertad dal pled, da la pressa e dal dretg d'elecziun general decretada dal zar èn l'iel che metta en funcziun cun grond success la maschinaria revoluziunara. Trotzki survegn sco praschunier la plattafurma ch'al renda famus en l'entira Russia. Sia cumparsa, ses carisma e ses pled da defensiu èn talmain impressiunants che la polizia, il president da la dretgira, gea l'entir stadi resp. quai ch'è anc restà da quel, tschessan spaventads.

Entant vegn il giuven revoluziunari bandischà anc ina giada. Puspè al reusescha – anc pli spert che l'emprima giada – la fugia. El arriva en la Finlan-



Leo Trotzki – il scriptur.

FOTOS RORO

da, alura en la Germania e l'Austria. Il 1915 s'incuntran Trotzki e Lenin en Svizra. Suentar la renumada conferenza a Zimmerwald en il chantun da Berna sa mettan ils dus gronds revoluziunaris perina. Trotzki sa renda a New York. Là survegn el il 1917 la nova ch'i saja danovmain rut or ina revoluziun en Russia e ch'ins haja stabili ina regenza provisorica. Trotzki returna immediat cun sia famiglia en la Russia. Cura ch'el arriva ils 17 da matg a la staziun finlandaisa da St. Petersburg, vegn el beneventà freneticamain da millis da persunas. Ils 21 da fanadur furma il revoluziunari social Alexander Kerenski ina nova regenza cun la devise da «salvar las conquistas da la revoluziun». Ils vairs exponents da la revoluziun, Trotzki e Lenin, èn però in privel per questa regenza. Ad ella na resta nagut auter che d'arrestar Trotzki. Però gist qua tras survegn Trotzki anc dapli publicità e dapli aderents. Davent da sia cella publicitgescha el in artitgel suenter l'auter. Sia influenza crescha ad in crescher. I dat dentant anc in davos manader carismatic dal zar: general Kornilow. Quel sto Kerenski ussa clamar en agid. Ma tge capita, sche Kornilow vesa en el era mo il revoluziunari? En las pli grondas stretgas sa metta il primminister en contact cun il praschunier Trotzki en sia cella. Las truppas en la chapitala n'obedeschan betg pli a la regenza. En sia cella prenda Trotzki las emprimas mesiras per defender la chapitala. Qua pretenda il general Kornilow la demissiun da la regenza. Ses combat fa però spert naufragi. Kornilow sto fugir. Kerenski propona in nov parlament. Ma il temp per discussiuns è spirà. Usa dovri acziuns. E quella realisescha Trotzki. En in'ovra organisatorica maisterila armescha e structurescha Trotzki atgnas gardas cotschnas e proclamescha sco manader militar e politicher enina ch'i sa tractia da defender immediat las conquistas revoluziunaras cunter ils inimis interns ed externs. El sa dat sco legalist revoluziunari, sco manader che respecta la lescha e sa chatta sin il medem stgalim sco la regenza. Quella ha dentant pers tut sia pussanza e Trotzki sto mo anc sa servir.

Creder da la pli gronda nova armada dal mund

En la nova regenza, l'uschenumnà cussegli dals cumissaris dal pievel, daventa Leo Trotzki sut Lenin minister da l'exteriur e sco tal segund pussant um. L'Emprima guerra mundiala n'è anc betg a fin, ed en il vest furiescha la

guerra da las pussanzas occidentalas cunter la Russia. Trotzki vegn duvrà per las tractativas da pasch da Brest-Litovsk. Ma alura realisesch'ins spert ch'el è l'um per il post da minister da defensiu. Las novas da la victoria dals 7 da november 1917 en la chapitala St. Petersburg avevan era cuntanschì Moscau ed autras citads grondas ch'eran s'associadas a la revoluziun. E l'imperi zaristic, l'entir apparat statal era en agonia. Percunter sa furmavan fermas armadas zaristicas sut ils generals Denikin e Wrangel en il sid, Judenitsch en il vest e l'admiral Koltschak en l'ost. Ed adina dapli armadas estras intervegnan en questa guerra civila.

Gia l'entschatta d'avust vegn la nova che la Tschechia smanatschia seriusamain Kasan.

En quest mument sa serva Trotzki da ses instrument da guerra genial e legendar, in tren armà cumponì en gronda prescha sin ses cumond la notg dals 7 sin ils 8 d'avust 1918. Gia a l'alva dal di banduna Trotzki cun quel Moscau per sa render spert a Kasan, la front il mument la pli privlusa.

Cun il tren armà visita il generalissim tut las fronts

Gia durant ses viadi survegn Trotzki la nova che Kasan saja vegnì conquistà. Ma cura ch'el famus manader carismatic cumpara en las emprimas lingias, cumenza la situaziun a sa midar. Ils regiments revoluziunaris che sa retiravan gia sa laschan entusiasmar da tala maniera ch'els cumenzan ina cunterattatga.

Ils sovjets avevan l'avantatg da sa preschentar a moda unifurma e centrala ed els avevan la simpatia dal pievel. Ils cuntrarevoluziunaris percunter n'avevan nagin messadi ch'entusiasma, plinavant eran els sparpagliads, senza ina direcziun centrala ed oravant tut senza ina gronda citad, senza la chapitala. Il zar Nikolaus II e sia entira famiglia eran vegnids assassinads.

Extirpaziun tras Stalin

Durant tut ils onns da l'avanzament e da la stabilisaziun da la pussanza sovietica vegniva Trotzki persequità d'ina sumbriva nunspegada, strusch vesavla: Josef Stalin, vindicativ, intrigant, privlus e mediocher.

Quel era il 1820 il cumissari politic superiur da la 10avla armada. Alura atatgan ils Polacs il mars 1920 la Russia. Puspè sa renda Trotzki a la front, a la testa da l'armada cotschna creschida sin in mez milliun umens. In dals generals,

Budjonny, aveva survegnì il cumond da segirar l'ala sid da l'avanzament vers Varsovia. Per spira schalusia surpleda Stalin il general Budjonny da desister da quest manever da segirezza ed ils Russ perdan alura la guerra cunter la Polonia. Sin quai lascha Trotzki clamar enavos Stalin a Moscau. Stalin n'ha mai perdunà a Trotzki questa umiliaziun.

Stalin era dentant avanzà al secretari general da la partida, a prima vista in post pauc impurtant. Dentant gist en questa posiziun s'univan tut ils fils da la pussanza.

Suentar la mort da Lenin il 1924 occupa Stalin tut ils uffizis superius cun socis loials. Trotzki vegn dischlocà dal Kremlin – Moscau era entant daventà la chapitala – privà da tut ses uffizis ed exclus da la partida. Ils 16 da schaner 1928 cumonda Stalin da deportar Trotzki e ses aderents en Sibiria. A la fin da l'onn vegn Trotzki bandischà a Constantinopel.

La persecuziun tras ils vindicators da Stalin vegn pli e pli brutala. Las atatgas sin Trotzki s'augmentan. Anc po el mitschar. Sistemamicamain vegnan però ses uffants, gea schizunt ses biadis assassinads. El sto fugir en Frantscha, alura en Norvegia. Dapertut tremblan las regenzas davant il tiran terribel a Moscau. Finalmain sa declera in uman curaschus, betg per casualità in militar, da l'autra vart dal glob, en il Mexico lontan, pront da dar asil a Trotzki e sia escorta anc en vita. General Lazaro Cardenas, il president da Mexico, trametta in cortegi da la regenza per beneventar Trotzki a la costa ed al manar tar el a Mexico-City.

Sin recumandaziun da la polizia e dal servetsch secret vegn la chasa da Trotzki midada quasi en ina fortezza.

Qua datti però anc in um curius che para dad esser l'ami d'ina secretaria. Jacson fa finta da s'interessar per la litteratura. Uschia al reuseschi da s'avischinar a Trotzki.

Jacson è en la stanza da lavur da Trotzki pervi d'in artitgel. Qua auda Natalia Sedowa a las sis da la saira dals 20 d'avust 1940 in davos sgarschavel sbratg da ses um. Jacson aveva pitgà cun in zappunet a moda brutala da davos en sin il chau dal grond generalissim.

Cura ch'els secretaris e guardians èn currids natiers ed han pitgà quasi a mort l'attentader, als ha Trotzki, moribund, cumandà da chalar. Salvar han ins la finala pudì a l'ospital mo anc quest Jacson, quest diavel tramess da Moscau ch'ins ha pudì identifitgar incontestablmain sco Ramon Mercader, attentader en il sold da Stalin. Trotzki sez è mort in di suenter l'attentat.



Leo Trotzki (amez) tar las contractivas da Brest-Litovsk, 1918.



Leo Trotzki – il schef d'armada.